

NOS hendenan SPECIAL

Norman Thijsen:

UN PÖETA ARUBIANO CU TIN SU PROPIO LEMA: "GRANDEZA DI UN PAIS TA E CULTURA DI SU PUEBLO!"

Redacta pa : Mercedes Abdul

DIARIO su espacio "Nos Hendenan Special" tin como invitado awe, e hoben Arubiano Norman Thijsen, kende a biba 10 aña na Hulanda unda e tabata hopi activo den diferente tereno. Ademas di studia y traha, el a pasa aya su servicio militar obligatorio. Norman ta un di e pöetanan hoben di Aruba cu tin e deseo pa un dia publica un buki di su poesianan. Riba tur e aspectonan aki, Norman ta elabora seguidamente.

Norman a pasa su enseñanza basico na Heilig Hart College na Savaneta. Di eynan el a bay pa Filomena College MAVO, y ora el a caba a drenta MTS unda a keda dos aña, y despues el a biaha pa Hulanda pa sigui studia.

"Na prome instancia mi a bay pa sigui estudio di Verpleegkunde, pero despues di poco tempo mi a stop cune, y mi a dicidi di bay traha. Despues di siete aña mi a dicidi di sigui school atrobe, unda mi a haci MEAO opleiding.

Despues di esey mi a regresa Aruba y actualmente mi ta trahando na Caribbean Mercantile Bank, departamento di credito".

NA HULANDA

Durante e periodo cu Norman a biba na Hulanda el a drenta servicio militar obligatorio, el a traha y tambe e tabata envolvi riba tereno social-cultural, pa e Arubianonan na Hulanda.

Servicio Militar: "Na Maart 1987 mi a drenta servicio militar unda mi a keda 14 luna. Mi tabata encarga cu administracion "intendence". E tabata un tempo dificil. Un di e motibonan ta cu mi tabata unico Arubiano den un grupo di hende cu mi no tabata conoce y cu mi mester a adapta mi mes na dje. Loke mi a siña si, den e servicio militar ta e disciplina".

Riba tereno laboral: "Mi a

traha 5 aña na un compania cu ta traha transmision di auto. Mi a cuminsa como productie medewerker y despues mi a worde promovi pa Bedienings-vakman, cu ta e persona encarga cu e armamento di hydroliek (systeem)".

Tambe Norman a haci diferente vacancy job durante su estudio manera, e.o., den cushina na un restaurant Italiano, den un famoso fabrica di chuculati (hagelslag).

"Tur esaki mi mester a haci pa haya un entrada extra pa yudami cu mi estudio".

Riba tereno social-cultural: "Mi a forma parti di directiva di Asociacion "Nos Baranca"; un asociacion cu ta traha na bienestar di Arubianonan biba na Tilburg.

Nos Baranca a bira conoci pa e festival di Dera Gay, cual ta worde organiza en grandi cu hopi musica y baile di Dera Gay.

Despues di Arubadag e tabata, y sigui ta, e actividad Arubiano di mas grandi na Hulanda. Fuera di esaki nos tabata organiza hopi encuentro social tanto pa e Arubianonan residente na Hulanda como studentenan cu ta bin cu beca".

Norman tambe a forma parti di e asina yama "Crisis Team" cu a worde lanta for di Arubahuis, tempo cu e avion a cay na Bijlmer, Amsterdam.

"Mi a asisti na e crisis opvang centrum unda nos tabata tin un tarea hopi amplio. Por ehemplo, nos mester a tuma encargo pa yuda e Arubianonan cu a keda sin hogar, y busca informacion tocante e Arubianonan cu a fayece. E tabata un experiencia cu nunca mas lo mi por lubida".

NA ARUBA

Norman a regresa Aruba dia 30 di September 1994. Despues di dos siman el a logra di haya trabao na Carib-

bean Credit cu un contract di seis luna.

"Mi a haci mi esfuerso y despues di un par di luna ya mi a bira un empleado vast. For di Hulanda caba mi tabata tin deseo di bay traha na Banco. Kizas esaki pasobra tempo cu mi tabata den e directiva di Nos Baranca semper mi a funciona como tesorero. Despues di 10 aña na Hulanda pa ami y mi famia a bira tempo pa bolbe Aruba, y mi ta contento cu nos a logra di estabiliza den nos pais".

Actualmente Norman ta tesorero di Fundacion Dera Gay, cual tin como meta pa promove e cultura di Dera Gay. Ademas Norman ta coordinador di e Festival Nacional di Dera Gay cu lo bay tuma lugar dia 30 di Juni, riba Plaza Betico Croes.

"Festival Nacional di Dera Gay ta un festival unda cu centronan di bario y clubnan cu tambe ta traha riba tereno social-cultural, ta bini hunto pa participa y celebra e cultura di Dera Gay. Por ehemplo, e aña aki, lo tin concurso di baile di Dera Gay, festival di canto di Dera Gay, rancamento di bandera, y e Dera Gay tradicional".

COMO PÖETA


Norman a cuminsa skirbi poema desde aña 1982.

"Mi inspiracion a bin tempo cu mi y mi ruman homber, Robert, cu ta drummer, tabata tin e deseo di compone cantica. Ya cu mi no por toca ningun instrumento mi a dicidi di skirbi e letranan pa cantica. Esakinan tabata worde skirbi na Ingles.

Mi tin cu bisa cu loke mi a skirbi e tempo ey no por worde considera como poesia sino mas bien como "song tekst".

Na Hulanda mi a cuminsa desaroya mi mes mas den tereno di poesia, y ta for di e tempo ey mi a cuminsa skirbi na Papiamentu.

Mi tabata haya hopi falta di



NORMAN THIJSEN

Aruba y esey a inspirami pa skirbi poesianan tocante mi pais".

Pa Norman skirbi un poema e palabranan cu e ta pone riba papel ta sali di manera spontaneo. E por sosode cualquier momento. Anochi e por lanta for di soño, cende luz, sinta skirbi.

"Pa mi poesia ta un expresion di un inspiracion cu mi a haya. Mi ta kere cu esaki ta un talento cu bo ta nace cune, pero e ta desaroya na un dado momento y ta hopi mara na bo sentimento na e momento ey".

Norman ta conta cu un aña despues di e desaster na Bijlmer el a worde pidi pa declama poesia pa conmemora e momento tristo ey.

"Esaki tabata e prome biaha cu mi a declama den publico. Mi a declama tres poesia di mi mes inspiracion y dos di un amigo di mi. Nunca mi tabata sa ki efecto poesia tin riba hende, te cu e dia ey. Durante cu mi tabata declama mi tabata weita e emocion den e wowonan di e famianan di e fayecidonan.

E dos canalnan di television Hulandes N.O.S y R.T.L-4 a bin film y nan a pase anochi".

Un di e momentonan mas significativo pa Norman ta e

dia cu el a entrega Padu del Caribe un poema dedica na dje, cu el a pone den un plakaat den forma di piano.

"For di e dia ey hopi hende ta pidimi pa mi skirbi algo pa nan. Por ehemplo den carchi di matrimonio, entre otro.

Actualmente mi a haya peticion di Misa di Savaneta pa mi skirbi poesia pa e Prome Santa Comunión cu lo tuma lugar na Mey proximo".

Norman su meta ta pa den futuro skirbi su buki di poesia. "Actualmente mi tin mas cu cien poesia skirbi caba".

Den **DIARIO** mes nos lectornan por a lesa cuatro di e poesianan di Norman.

FAMIA

"Grandeza di un pais ta e cultura di su pueblo" y "Mi famia ta mi forza y mi consuelo" ta e lemanan di Norman Thijsen, kende por cierto ta casa cu Gina Maduro, di cual matrimonio tin un yiu yama Aisha di 3 aña di edad.

"Mi famia ta hopi importante pa mi, pasobra nan tey semper pa mi".

Esaki no solamente ta su esposa y yiu, pero tambe su mayornan Juan y Margot y nan seis yiunan. Norman ta hopi orguyoso di pertenece na un famia cu semper ta uni.